

Date – 12/05/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Ramchhunga nurse chawimawina sang ber, National Florence Nightingale Award chu Tuichawng Ayush Health & Wellness Centre-a Health Worker Pi Lalenthangi Hnamte hnenah hlan a ni.
2. Fisheries Department leh Central YMA ten Luidung Humhalh zui turin vawiin khan thawhhona thuthlung an ziak.
3. National Testing Agency (NTA) chuan kumin 2026 NEET (UG) exam tun thla ni 3 a neih chu a cancel.
4. Vawiin khan Assam Chief Minister atan BJP hrwaitu Himanta Biswa Sarma chu a term hnihna atan lakluh a ni.

<><><>

NURSES DAY

Ramchunga nurse chawimawina sang ber, National Florence Nightingale Award chu vawiin khan Rastrapati Bhavan, New Delhi-ah President Droupadi Murmu –in Tuichawng Ayush Health & Wellness Centre-a Health Worker Pi Lalenthangi Hnamte hnenah a hlan. Award hian certificate of merit, Cheng Nuai 1 leh medal a keng a ni.

Mizoram chhunga thawk nurse mi 17 in he chawimawina hi an dawng tawh a. Kumin a dawngtu Lalenthangi Hnamte hi 18na a ni.

Kan corr report ngaithla ang.

VC

Pi Lalenthangi Hnamte hi Auxiliary Nurse Midwife (ANM) niin, kum1999 atang Healthworker-ah appointment hmuin Lunglei District chhunga hmun hrang hranga Health Centre-ah hna a thawk a, tunah hian Tuichawng AHWC-ah a thawk mek a ni. A hnathawh chung zawngin TB, HIV/AIDS, Cancer enkawlna, rilru hrilselna, kum upate enkawlna, Phar enkawlna, nu leh nau hriselna leh COVID-19 kaihnawih programme hrang hrangte chu theih tawp chhuahin a thawk thin a ni. Pi Lalenthangi Hnamte hian emergency leh natna benvawn enkawlnaah theih tawp a chhuah thin a. Inzirtirna programme, school hriselna leh natna inkaichhawn theih loh chungchangah screening-te a buatsaih reng a ni. Mizoram hmun kilkhawra hna thawk niin, a bial tam zawk hi lirthei luh theih lohna a ni a. Ke-in emaw lawngin emaw damlo tlawh leh vaccine pe turin a kal thin a ni. Amah hi mi taima leh tlawmngai tak a ni baw.

Vawiin hi Khawvel Puma Nurse-te ni (International Nurses' Day) a ni a. Florence Nightingale-i pianchham May ni 12 a hman thin a ni. Mizorama District hrang hrangah pawh hman a ni a. Aizawlah chuan he ni hi Dawrpui Multipurpose Hall ah hman niin, Food Civil Supplies and Consumer Affair Minister Pu B.Lalchhanzova'n a hmanpui.

He hunah hian thusawiin, nurse te inpekna chu Florence Nightingale-i hniakhnung zui a, an mahnia Nightingale-i awm a chu chhawm nung zel tura chahin, an mahni kal tlangin Nightingale-i chuan nurse hna a la thawk reng a ni a ti a. Chu rilru chu an put chhung chuan nurse hmantlak, mi tha tak, thiam tak, biak nuam tak, midang te tana inpe ral a, midang tana malsawmna thlen tu an ni thei dawn a ni a ti.

International Nurses Day pual hian Health Workers Training School, Kulikawn zirlaite chuan Blood donation Camp an nei a. Thisen hi mipa 28 leh hmeichhia 12 in pe theiin a vaiin unit 40 an pe a ni. Thisen hi Civil Hospital Aizawl Blood Bank te chuan Health Workers Training School-ah hian kal chilhin an laksak a ni.

<><><>

AMC

Vawiin khan Aizawl Municipal Corporation term 4-na atana Executive Council Meeting hmasa ber chu Mayor Pu H. Lalremtluanga kaihhruainain a chamber-ah neih a ni.

Executive Council chuan AMC hmasawnnan a hmalakna tur chi hrang hrang leh felfai taka chak zawka hmalak dan turte, khawpui chhung enkawl kawnga hna a thawh dan tur pawimawh tak takte sawi hoin hmalak dan tur ruahmanna an siam ani.

Vawiin meeting-ah hian Aizawl khawpui chhung changkanna leh hmasawna ruhrel hmel thar an hmuh zel theih nan Ward Committee din dan tur leh chak zawka kalpui a nih theihna tur te sawiho a ni a, AMC tha alo chak leh zual zawk nan Local Council te nena inthlawp tlata tha leh zuala thawhho dan tur te sawiho bawk a ni.

Pu Lalremruata Kullai, Joint Municipal Commissioner chuan AMC dinmun leh a hnathawh thin bakah, AMC in dan leh hrai a kenkawh hrang hrang chunchangah presentation-pe in, AMC function hrang hranga hmasawna tur leh mipui tana chhenfakawm zawka kal pui turin zirchian ngai lai te lo zirchiang turin Study Team din rel a ni bawk.

Meeting-ah hian Pi R. Lalawmpuii, Deputy Mayor leh Executive Council Member – Pi Christina Roluahpuii Sailo, Pu Vanlalhruaia, Pu Vanlalfaka, Pu K. Lalrodinga, Pu Joseph H. Lalramsanga, Municipal Commissioner leh AMC-a officer dang an tel.

<><><>

TLABUNG SUB DIST HOSPITAL

NABARD RIDF sum cheng nuai 600 senga sak Tlabung-a Sub-District Hospital building thar chu Health & Family Welfare Minister Pi Lalrinpuii'n vawiin khan a hawng.

Health Minister Pi Lalrinpuii chuan mipuite'n t̄angkai zawka damdawi in an chhawr theih nan a enkawlna leh inrelbawlna lam a pawimawh hle tih sawiin, natna zawn chhuah hna thawktu laboratory lam te, damlo enkawltu nursing lama thawkte leh doctor te, eirawng bawltu bakah a t̄ifaitute thlenga t̄ha tak leh inpawh taka an thawh ho a t̄ul hle tih a sawi a. Tlabung Sub-District Hospital chu hmanraw t̄ha zawk leh thawktu tam zawk nena thuam changtlun a nih chuan hmunpui pan ngai t̄hin tam tak chu enkawl theih an nih tawh dawn avangin mipuite'n an chhawr t̄angkai lehzual thei dawn niin a sawi.

Pi Lalrinpuii chuan Mizorama doctor indaih lohna zualpui phuhruk nan MBBS 20 leh BDS 5 lakna tur thil pawimawh te hmanhmawh taka buaipui mek a ni tih sawiin, mipuite'n an chhawr t̄angkai zawk theihna tura District Hospital, Sub-District Hospital, CHC, PHC leh Medical College te tihchangtlun chhoh zel tum a ni a ti.

Sub-District Hospital Tlabung hawnaah hian West Tuipui bialtu MLA Pi Prova Chakma chuan Tlabung damdawiin sak thar leh tihchangtlun a ni chu lawmawm a tih thu sawiin, t̄ha zawka thuam changtlun zel a nih a beisei thu a sawi a ni.

Sub-District Hospital Tlabung hi khum 30 awmna a ni.

<><><>

FISHERIES MOU

Fisheries Department leh Central YMA ten Luidung Humhalh turin vawiin khan thawhhona thuthlung an ziak a. Fisheries Minister Pu Lalthansanga Pisa-ah Fisheries Department aiawhin Director Pi Zonuntluangi'n hming a ziak a, Central YMA aiawhin President Pu R. Lalnggheta'n hming a ziak a ni.

Fisheries Minister Pu Lalthansanga chuan Fisheries Department tan luidung zawng zawng vil a harsat thu sawiin, Tlawmngai pawl lian ber YMA ten luidung humhalh nachang hria a, Branch ten theihtawp a mahni huamchhungah hma an lo la thin chu a lawmawm hle a ni, a ti a. Lungrual taka Fisheries Department leh YMA te thawhhona hian rah tha a lo chhuah tawh thin a, kum 2 an thawhho lehna turah hian Fisheries Acts leh Rules hnuaiah awmze nei leh tangkai zawka Mizoram luidung hausakna hman kawngah hma an sawn phah ngei a beisei thu a sawi a ni.

Inkhawm kaihruiatu Fisheries Secretary Pu Lalrothanga chuan YMA te nena thawhhona tha tak an nei chu lawmawm a tih thu a sawi a. Sangha vulh kawnga farmer te hmasawn zelna tur leh Mizorama sangha tam zawk thar chhuahna atan hman tangkai a tul thu sawiin tha zawka thawhho zel a beisei thu a sawi a ni.

VC

Fisheries Department leh Central YMA hian kum 2021 atang khan Thawhhona Thuthlung hi kum 2 atan zel an lo ziak tawh thin a, tunah hian a tum 3 na atan thawhhona thuthlung hi an ziak leh a ni. He thawhhona hian Mizoram luidung nungcha venhim leh humhalh kawngah nasa takin rah tha a chhuah zel a, tunah hian YMA Branch 93 zetin luidung humhalh bik an nei a. He an hmalakna avang hian Mizoram Luidungah sangha an pun phah mek zel a. Chu bakah luidung humhalh inzirtirna kawngah te, luidung venhim leh dan phal loh hmanrua hmanga sangha man chingte manchhuah kawngah Fisheries Department ten chak zawkin hma an lak theih phah a ni.

<><><>

DONER SECY

Ministry of Development of North Eastern Region (DoNER) Secy Pu Sanjay Jaju an vawiin khan Champhai District tlawhin hmun hrang hrang a tlawh kual.

Pu Sanjay Jaju hi Champhai District Agricultural Marketing Committee (DAMC) member leh Sawhthing hralhna lam buaipuitu, SCC hruaitute'n New Champhai Helipad ah an lo hmuak a, Champhai Bawrhsap Pu Mohammad Aaquib chuan sawhthing hralh chungchanga Champhai dinhmun te a hrihfiah.

Hemi hnu hian Secretary Pu Sanjay Jaju chuan Champhaia Horticulture leh Food processing lama hmun pawimawh te leh siam mek te heng - Tlangsama Grape Winery te, Zote khua leh New Champhaia Sapthei sawngbawlina tur (Passion Fruit Processing Unit) leh Goverment Oak Tasar Seed Farm, Champhai Tlangsam a mi te a hmunah kalin a enfiah a, heng bakah hian Zomi Cultural Centre & Preservation of Zomi Historical Sites, Champhai Tlangnuam Veng a mi pawh a tlawh bawk.

Hemi hnu hian Champhai District a Department hotute a kawm hnuah Aizawl a pan in a kir leh nghal a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

NEET

National Testing Agency (NTA) chuan kumin 2026 NEET (UG) exam tun thla ni 3 a neih chu a hnawl. Social Media lama tarlan danin NTA chuan zirlaite tana tha zawk turin he thutlukna hi siam anih thu leh mipuiten NTA ah rinna an nghat tih a hrait avangin exam neih tawh chu pawm loh a rel a. Zawhna putrua puhna awm chu Central Bureau of Investigation (CBI) chhui turin an pek tawh thu sawiin CBI te hi theihtawpa thawhpui an intiam a. NTA chuan exam neih leh hun tur hi a la puang lo a ni.

<><><>

ASSAM CM

Vawiin khan Assam Chief Minister atan BJP hruaitu Himanta Biswa Sarma chu a term hnihna atan lakluh a ni. Lakluh inkhawm hi Guwahati-a Khanapara Veterinary College Ground-ah neih a ni a. Governor Lakshman Prasad Acharya chuan Chief Minister hi rinawmna thu tiam tirin a lalut a. Hemi rual hian Cabinet Minister lakluh an bawk a. BJP atangin Rameswar Teli leh Ajanta Neog, Asom Gana Parishad atangin Atul Bora leh Bodoland People's Front Charan Boro te lakluh an ni. Tum hi NDA-in Assam-ah a zawna sawrkar an siam vawi thumna a ni a. Inkhawmah hian Prime minister Narendra Modi, Union Home minister Amit Shah, Defence minister Rajnath Singh leh BJP national President Nitin Nabin te pawh an tel a ni.

<><><>

TAMIL NADU LIQOUR RETAIL CLOSED

Tamil Nadu Chief Minister C. Joseph Vijay-a chaun zirna in, biak in leh bus stand hnaihah zu zawrhna 717 a khar. Thuchhuah siamin heng zu zawrhna Tamil Nadu State marketing Corporation (TASMAC) hnuai awm zawng zawng zirna in, sakhaw biak in leh bus terminal atanga meter 500 biala awm zawng zawngte chu khar vek turin thupek hi siam a ni a. Kar hnih lo awm tur chungin heng zu dawrte khar an ni ang.

<><><>